




Tir Yimiyim



TAPAK 7 Yangia anidakangma : Tir Yimiyim tiryimiyim@aolima tir yimiyim **TAPAK 8**

Linük tim atemba ya India-ia masü, US-ia masü: Nawaz Sharif

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com



Nuno Espirito-i Nottingham Forest coach mapa agizükogo

VOL. XXI NO. 74 (ADOK 74) DIMAPUR YANGTEPNÜ (THURSDAY) LUCHII (DECEMBER) 21, 2023 ₹ 5.00

Varanasi nung PM Modi den Nitish, Priyanka mesüra Kejriwal nungeri tokteptsü akok



Kejriwal

Priyanka

Nitish

New Delhi, Luchii/December 20 (Agencies): India nung opposition party temi tetetba "INDIA" ajanga taruba elections nung Ato Kilonser Narendra Modi den par Lok Sabha constituency, Varanasi nung tokteptsü asoshi political "heavyweights" asem - Nitish Kumar, Priyanka Gandhi Vadra aser Arvind Kejriwal tenüng amshir.

1991 küm nungi Varanasi ya BJP asoshi tashi tait constituency ka lir, aser iba constituency nungi Modi-i 2014 aser 2019 elections nung takok angu.

Congress temi iba menden nung tatamsa 1984 küm mena lir, anungji opposition temi ato kilonser ket nungi iba menden rakzüksü ya tamakoktsü amai kumdahtsür.

Osang kar ajanga ashiba agi, taruba küm general elections nung iba constituency nung Bihar Chief Minister aser Janata Dal (United) lenir Nitish Kumar ya ang tokteptsü amai lir.

Pa ya BJP anemer tetsüti ka lir aser taoba mapanga ato kilonser asoshi pa toktepdaktsütsü jembia liasü.

Kasa mapang INDIA senden mamandang Patna nung pa indang PM candidature bhukuma poster tem temai adok, saka JDU-i shilem

agia mali ta ashir. Ano Congress General Secretary Priyanka Gandhi Vadra tenünga amshir.

Lai election nung kodanga metoktepaka lai Varanasi nungi mezüng tokteptsü akok ta küm aika jembia arur.

2019 küma kanga sashia jembi, saka tatem nung Congress-i candidate danga ka yok aser vote ishika agi tamakok ajurua liasü.

Aser tang la tenüng ya West Bengal Chief Minister, Mamata Banerjee-i benok ta ashir.

Delhi Chief Minister aser AAP lenir Arvind Kejriwal tenüng ya amshir.

2014 küm pai Varanasi nung Modi den toktep, saka vote aika agi tamakok ajurua liasü.

Ato Kilonser Modi den tokteptsü ya temela masütsü. Tawa election agiba nung BJP-i Madhya Pradesh, Rajasthan aser Chhattisgarh nung kanga junga takok ngua lir.

Mapang ajak nung BJP-i Modi dak metaloker aser taruba election nunga pai shilem tulu agitsü.

Külen INDIA bloc ya tang tashi menden lemsar tokteptsü tsütsü mangatetep agi sünga lir ta angazüker.

NBSE kübok register süa aliba school tem asoshi metetdaksür

Dimapur, Luchii/December 20 (TYO): Ministry of Youth Affairs and Sports, Government of India ajanga "Mera Yuva Bharat (My Bharat)" nungja agütsür Autonomous body ka October 31, 2023 nü tenziükogota Nagaland Board of School Education (NBSE) ajanga sangdong ka nung Heads of Registered Schools tem dang metetdaksü.

India nunger lanurtem nem social mobility, educational equity aser practical skill development ajanga tashi agütsütsü nukjidong nung iba sentong ya tenziük.

My Bharat ajanga phygital (Physical+Digital) ecosystem amenoka experiential learning, volunteering aser internships agütsür.

Iba inyakyim nung shilem agitsü atema arishi küm 15-29 tsüngta lanurtem [My Bharat's official website](https://mybharat.gov.in/) nung register asütsü ajungshir.

Registration atema https://mybharat.gov.in/ nung angutsü aser lanur ka ama Email ID mesüra Mobile Number amshia register sütettsü.

Youth category kübok nungdakba tejangja agütsüba sülen "NYKS" shimtsüla aser submit asütsüla.

Kaketshir ajunga nung iba tongtipang osang agüja iba maparen nung parnok yaritsü Heads of Registered Institutions ajunga dang ayongzüker, ta sangdong ajanga ashi.

Naga Students' Federation-i Naga Club Building azüngtettsür

Dimapur, Luchii/December 20 (TYO): Kohima nung tang Naga Club building aliba Naga heritage ya Naga nunger timtem-tuoshi balala ajangtetba temaitsü ka ama küm aika nokdaka arur, kong May 16, 1951 nung Naga Plebiscite densema puti otsü aika ajanga aruogo, ta Naga Students' Federation (NSF) sangdong ka ajanga ashi.

Asen nüburtemi tayongzüka balala, takum bendanga agütsüba aser telemtetba tasak agiba ajangshia aru. Iba ama mepetmesü agi sünga aliba mapang ka nung Naga Students' Federation-i tangatetba tajung nung iba Naga heritage wazüka ayutsü aru, koba tejen kumaka meren-merena nokdaka liasü.

1983 küm Asür Vizolie Sorhie ya NSF tir akumdang pa aser par teloki iba mapang Forest Department amshia aliba Naga Club building ya tanaben agitsü asoshi Naga Club mendenpur aser Naga Elders Conference dang asüngdang.

Ajisüka ishoben iba tesem ya tanaben agitsü merangaka Department-i chichiba kubur - Naga Club nem agütsütsü memulung. Iba sülen Asür Vizolie

Sorhie, NSF tir, asür Mechimvu Ritse, finance secretary NSF, Neingulo Krome, Action Committee NSF züngsem, Kewezu G. Kenye, ANCSU tir, parnoki anir NSF ajanga April 1983 nung Naga Club building shibanga aliba lapoka amshi tenziük, ta NSF tir Medovi Rhi aser tongti zülur Chumben Khuvung nati sangdong ajanga ashi.

Iba sülen Neivor Rutsa-i pa indang gari tenla agüja NSF office ya Naga Club building-i belen.

Iba ki ya teti Naga Club meyong asütsü aser tensa agi akhangba ama iba ki nung NSF ya 'guardian aser custodian' ka ama alitsü mulungtep.

Iba Naga Club Building nung NSF amenokba sülena Government of Nagaland ajanga asemben ki azüngtsütsü totuyuba agütsü, saka NSF maneni tasü ita nokdak.

Iba sülen tesüba küm 40 tashi Naga Club building nungya NSF office amenoka Naga nunger ajunga kibong ka sür temaitsü ka ama otsü takum yuja aru.

Angami Public Organization (APO) aser Kohima Village Council (KVC) nungi December 9, 2023 nü NSF dangi shiti ka

züluba nung 28.06.2023 nü telemtetba agiba melenshitsü makok aser iba telemtetba ya shidak aser Naga Club building, Kohima nung aliba NSF office ya December 31, 2023 tashinung azüngtsütsüla ta shia liasü.

Mejangjaba nisung kari May 27, 2023 anepbongi NSF office, Naga Club building raksatsüba sülen Angami Public Organization aser Kohima Village Council tetsüngtai aiba aser nüburtemi mepishiba NSF ajanga pela agizüker. Mapang tatsüka lir iba ki raksatsüba ya tang aliba Naga Club züngsemtemi tenüng agia liasü.

Iba shiti nung ajemdaker December 14, 2023 nü NSF Emergency Federal Assembly amenba mapang, iba ken o tangatetep kati maru tashi December 20, 2023 nü nungi tenziük NSF indang office ya Naga Solidarity Park, Kohima nung belenoka atatsü pangzüng renem.

Naga nunger ajak dener iba mangatetep tatem kati maru tashi Naga Club building anepalua aser wazüka ayutsü Angami Public Organization mapa asütsü, ta NSF sangdong ajanga ashi.

NESO-i Manipur nung azüdokshi yutsür yimjung bushitsü ajungshir

Dimapur, Luchii/December 20 (TYO): State tenet nungi component units ti aliba North East Students' Organization (NESO) ajanga Manipur nung aliba nüburtem dang yimjung aser telungjem nung azüita mangatetep yutsür kati ka akumtsüboa aser angatetepa alitsü ayongzüker, ta NESO sangdong ka ajanga ashi.

Tawa azüdokshi atalokba nung iba mangatetep bentettsü nungdak ta angateter saka azüdokshi agi kodanga tangatetep kati marutsü. State

telungzüker nung tebilemba, takhangba aser ken o balala aliba ya yimjunglen nungi bentettsüla, jembishinü akatsüla aser lokti tentet ajungai angatetepetsüla, ta ashi.

NESO-i Manipur nung aliba nübur ajunga dang azüdokshi nungi pila alitsü aser kati ka state nung külem senso ama agizüksü ayongzüker.

Yimjung ajanga dang asenoki mangatetep bentettsü, arok asoshi mera agia maparen inyaksü aser yimjung aliba lokti ka yangertsü ta amanger, ta

NESO ajanga ashi.

Ken o tepenja lir aser mangatetep adoka aliba kin ajunga dang Manipur aser North East region nung NESO-i yimjung asoshi meranga inyakba pelashishia agizüksü ajungshir.

Tangatetep, tajunglen nungi jembishinütsü, tatok agütsüteptsü aser kin balala yimjung nung alitsü asoshi tensa bener arutsü mechi NESO-i meranga inyaka arur.

Benjong mapang arudang NESO-i nisung ajak dang yimjung nung aser jungtepa alitsü ayongzüker, ta sangdong ajangasa ashi.

Dimapur nung firecrackers/fireworks kumdanga amshitsü metetdaksür

Dimapur, Luchii/December 20 (TYO): Fireworks nokdangtsü asoshi taoba mapang sangdonga aliba ama Commissioner of Police, Dimapur ajanga ano maneni nüburtem dang firecrackers apokba nokdanga aliba nenshia metetdaksüogo.

Nüburtem timtem balala nungi kumzüka alitsü aser eco-friendly environment atema nübur ajunga dang khuret angateta firecracker amshiba nungi pila alitsü ayongzüker, ta CP Dimapur ajanga sangdong ka nung ashi.

Firecrackers ya lipajen asoshi lendong dang masü saka ola tulu adoka apokba aser tango tamajung adokba ajanga shiruru aser nisung temang nung timtem balala agütsür.

Ajisüka Christmas aser New Year mapang item fireworks ya aonung 11:55 ako nungi anepdang 12:30 ako tashi dang melatsü. Iba mapang Reduced Emission firecrackers (Improved crackers) aser Reduced Emission firecrackers (Green crackers: Safe Water and Air Sprinklers (Petroleum and Explosive Safety Organizatio (PESO) ajanga mela aser agizüka aliba SWAS) dak alaka danga firecrackers amshitsü memelar, ta sangdong ajanga ashi.

Item firecrackers ya licensed traders ajanga dang ayoktsü aser tayoker temi mela aliba firecrackers dang ayoktsüla. Silence zones nung fireworks kecha mamshitsüla, aser item

tesemtemji mozüki, nursing himes, primary aser district health-care centres, educational institutions, courts, tekülem ki mesüra ketdangtsür temi 'silence zone' ta sangdonga aliba tesem nungi meter 100 pilar ang amshitsüla.

Joined firecrackers (series crackers or laris) mesüra barium salts/lithium/arsenic/antimony/led/mercury aliba fireworks mesüra apokba tesem nungi meters pezü tashinung noise level 125 dB (A) mesüra 145 dB (C)pk tashi adokba ajak nokdang. Iba totuyuba nung aibelener nem ozüng agi melaba ama tapet temerenshi agütsütsü, ta Commissioner of Police, Dimapur sangdong ajangasa ashi.

MANGYIM JASHI LEMSATEPER

Tir Yimiyim nung Yimozülur den yariteper, Assistant Editor, Wb.Tiamongba P.Aier tebu Wb.R. Nukshi Aier alima nungi December 20, 2023 anepdang pilaa aoba asoshi kanga sasaa bilemer aser pai toktsür aoba kinungertem ajak den Tir Yimiyim nung inyakertem ajaki mangyim jashi lemsateper.

Iba ama mulungkurem mapang Tsüngremi asür kinungertem nem tesünep agüjangma ta sarasademtsür.

- Yimozülur & Inyakertem, Tir Yimiyim.

Mkg. nung 50 buba Inter-ward Christmas Cake Race sentong Dec.23 anepdang agitsü



Mokokchung, December/ Luchii 20(TYO): Mokokchung Town nung Inter-ward Cake Race agia arur kelen taküm 50 buba Inter-ward Christmas Cake Race sentong December 23 anepdang 7:00 ako nung agitsüta ADC & Administrator, Mokokchung Municipal Council(MMC) Mr.Chumlamo Humtsoe shiba Steering committee nung Convenor lir pai MMC Conference Hall nung December 20 nü osang zülurtem den jembidang shiogo.

Mokokchung nübur ajaki kanga dang yongyasetta aliba Inter-ward Cake Race sentong ya 2021 küm 50 buba sentongji agir alitsüba liasü saka pandemic aliba ajanga iba sentong anaben tashi magiteta aru,aji saka Mokokchung nung iba sentong agitettsüsa mapang agi bener arutsüba den külemi ano talisa Mokokchung Municipal Council, District Administration, All Ward Union, Mokokchung Town Lanur Telongjem, Bakery and Restaurant Association Mokokchung, Pick-up Truck

Owners Association Mokokchung, Mokokchung District Athletics Association parnok ajaki maparen ajak nung kanga dang nungita arudagita ADC Mokokchung Chumlamo-isa metetdaksü.

Mokokchung ADC-isa Mokokchung nung iba Inter Ward Christmas Cake Race ya 1971 küm Seasonal Club Mokokchung ajanga achayanga tenzük aser taküm iba 50 buba sentong ya Mokokchung Municipal Council aser Seasonal Club semtepa ayongzükter. Iba sentong Main Town Square nung December 23 anepdang 7:00 Ako nung tongti tejaoker Nagaland Legislative Assembly,Speaker Sharingain Longkumer aruagi tenzüksütsüta ashi.

Inter-ward Christmas Cake Race nung Ward 18 nung tetsür 2 aser tebur 9-i shilem agitsü aser iba den külemi ano "The Three Magi"ta asüba omen nung ajemdaker Fancy Dress tetoktepa alitsü.

Osang tajung kaji

Mokokchung nung iba Inter-ward Christmas Cake Race aliba mapang nung Wb.Supong Longkumerisa pai meyong Honda Motorcycle Pilot sür anir jaja liasü, taküm iba kasa Honda motorcycle-ji Wb.Supong Longkumerisa anir asemtepertemji Pilot asütsü, küm shi iba Honda motorcycle ya mamshi-i ayuba iba cake race nungtem renemshir atadar.

Iba Christmas Cake Race atema teteyuba map adokogo aser asemtepertemi kilometer 5 shi asemtsü Point 11 alitsü iba nungjagi tetsür anati Point anaji asema tenzüksü aser teburtemi tanüngbaji asemtsüta renema lir.

Christmas Cake Race takok ngua agitettsü asoshi Mokokchung Town Lanur Telongjem-i Timsür mapa inyaksü aser All Ward Ward Union Mokokchung-i anir Mokokchung nung aliba telok tentet ajaki kanga dang shisa agütsütepa yaridagita Steering committee nung Convenor, ADC Mokokchung Chumlamo-isa metetdaksüogo.

Ao Senden-i asüku lemsatep

Mokokchung, Luchii/ December 20 (TYO): Ao Senden Sanen Luden züngsem Wb. Tsükjemtangit, Chuchuyimlang yimtiba nungi, iba akümüli wadang tembangba osang angashia kanga nemjema aser sasasetta, Ao Senden-i asüku osang lemsatepogo.

Asür Wb. Tsükjemtangit ya kanga shisa terajem aser Aor asoshi shisa tajung agütsütetba yimsüsür aser Ao Senden Sanen Luden züngsem tajung aser tenungiter tongti ka liasü. Pa astüba ajanga Aor asoshi lenir

tajung ka samaogo ta sasasetar aser pa ama nübu tajung ka ngutettsü kanga tasak asütsü ta rataseta bilemer.

Iba asüku mapang nung pai toktsür aoba kinungtsü aser kinunger ajak nem tesünep agüjang ta sarasademtsür aser Asür nela teti tesüngzük aser yimjung nung yujang ta Ao Senden mendenti sarasadem, ta tir Chubawati Longchar aser Asst. Gen. Secretary Arentemjen Jamir nati külem sangdong ka ajanga metetdaksü.

Dimapur Press Club (DPC)-i asüku lemsatep

Dimapur, Luchii/December 20 (TYO): December 20 nü Dimapur Press Club (DPC) züngsem aser taoba DPC General Secretary, P Tiamongba Aier tebu asüba osang angazüka DPC mang ayimba lemsatepba den pa aser par kinungertem den asüku lemsatepogo.

Mangyim jashi mapang nung aliba mapang DPC züngsemtem ajak ner kinungertem den nokdaka lir aser sarasadem nung bilemetdar. Asür tanüla teti tatem makadak anisüngzükdakjang ta sarasademja ataba, DPC-isa lemsatepogo.

Don Bosco nung 'Bosco Fest' amungtsü



Dimapur, Luchii/December 20 (TYO): Don Bosco Alumni Dimapur aser Dimapur Naga Students' Union na longjemer January 7, 2024 nü nikonngtsütsü 4:00 ako nungi tenzükba 'Bosco Fest' amungtsü ayongzükba metetdaksüogo.

Iba sentong nung nungtugu kentener aser physician tem aser ano Rock/ Pop band Euphoria ngutetsang Abhijit Bhattacharya aser Nagaland nungi Lenen Jamir nungeri shilem agitsü.

Bodhbarnü osangbenertem den sensaksemba mapang Don Bosco Alumni, secretary Mani Shankar Das-i ashiba agi, lanurtem shirnok tarutsü lenirtem lir parnok ajungmesotsü atema iba sentong ayongzükba agir. Paisa, iba sentong ajanga aazükba sen ya career guidance densema

sentong balala atema amshitsü, ta ashi.

Don Bosco Alumni-i tang mezüngbuba iba sentong ya Nagaland nung ayongzükba agir ta shia, state balala nung aliba Alumni temi lanurtem ajungkettsü atema rangloker inyakdar, ta paisa shisem.

Dimapur students union-i iba sentong asoshi Don Bosco Alumni den longjemogo, kechyiong iba sentong ya kaketshirtem atema, koba tajungshiba tulu ka lir, ta DNSU züngsem kati ashi.

Iba sentong atema ticket online aser offline mode ajanga angutsü aser ticket sen 2999 (Platinum),1999 (Gold), 999 (Silver) aser 499 (Bronze) asütsü. Maneni iba sentong ayongertemi nüburtem ajak dang iba sentong nung arua shilem agitsü ayongzükogo.

Pang Students Union Hon Jubilee mungogo

Dimapur, Luchii/December 20 (TYO): Pang Students Union Hon jubilee December 19 nü Pang Public Ground Hall, Noklak nungmungogo. Hon Jubilee ya "Vision Infinitum" omen nung ajemdaker munga liasü.

Sentong nung MLA Benei M Lamthiu alakteta jaoker liasü. Sentong nung o jembiba mapang MLA-i, Union züngsem ajak dang küm 50 tsüngda kaketshir lokti tentet asoshi lenla balala nung teyari balala agütsüba asoshi parnok nem tenüngsang agütsü.

Lamthiu-isa, Tsüngrem nem

tenüngsang agütsü aser mezüngburtemi tasü ita aser tejangraba tulu nung iba lokti tentet tetetba aser 1973 küm nungi tang tashi union dang lensayua anitetba asoshi parnok nema tenüngsang agütsü.

Kaketshirtem ajungshiba mapang Lamthiu-i, kaketshisatsü bushiba nung meranga inyaksü koda tongtibang iba dak rangloker jembiba aser lokti terenlok asoshi kaketshitemi koda tongtibang shilem agir iba indanga lemsatepa liasü.

Sentong nungsa Pang Students Union, Peshu Students

Union, aser Khamniungan Students Union nungi lenirtemia o tatsütsü jembiba aser Pang Students Union mezüngbuba tir M. Cheye-i kaketshir lokti tentet tenzükba mapang tetsükdaksütem koda ajangshia aru, iba indang tatsü agi lemsatep.

Maneni sentong nung VCC Pang K. Hoamo-i lokti pela agizükba o jembiba, Convenor Jubilee Planning Board K. Puchiu-i tepela o jembiba aser alakteta jaoker-i nüngshilong aser Jubilee nungu kaket sayaja liasü.

Puliebadze base camp, Jotsoma nung Advent Christmas mungogo



Dimapur, Luchii/December 20 (TYO): December 19 nü Puliebadze base camp, Jotsoma, Kohima nung Deputy Commissioner office aser district office balala nungi staff tem Advent Christmas cum picnic mungogo.

DC Kohima, Kumar Ramnikant, IAS-i Christmas benjung salem lemsatep aser kinunger aser medemertem den tepala lemsatepba dak rangloker jembiba liasü. Paisa,

ajak dang temeim sayutsü, telongjem nung alitsü aser kati ka taoba ta züngshitepa taoba mapang tesasatem ajak toktsür tepela prokshitsü asoshi rangloker inyaksangshitsü ajungshia liasü.

Küm taseni ayaoka aiba mapang tashi tasen nung longjemer aitsü koda tongtibang iba indang lemsatep. Tulusang Tsüngrem sentong dak tamang ka-a atasa alitsü aser Tsüngrem sentongji kija teletmetba ajak

dang nungi taoba tang züngshitsü pai ajungshia liasü. Paisa, temoatsü asoshi maneni sarasademtsü ayongzükba liasü.

Maneni Ramnikant-i, agizükba dang nungbiba agütsüba temaotsüba ta shia taruba küma ajak longjemer tetsükdaksütem ajak koktetyonga aotsü ayongzükba liasü.

Iba sentong ya EAC (Judl), Dr. RikuKhutso lenisüba nung agi aser K. Rakalung-i temaotsü meshizüka sarasadema liasü.

Naga Students' Federation office shibanga atar

Dimapur, Luchii/December 20 (TYO): Naga Students' Federation (NSF)-i sangdong ka ajanga December 21, 2023 nü nungi January 10, 2024 tashi office shibanga ataba metetdaksüogo.

NSF-isa, Naga nunger aser state adena orr alirtem den benjung salem lemsatepogo. Christmas aser küm tasen ya lepa reprangshiba, temeim sayuba aser longjemba mapang ka lir. Federation-i benjung amungba mapang iba ajanga nisungshia taküm tetezü küta kümdaksütsü aser Nagaland nung timla tasen ka agüja longjemba aser pelatepba

mapang ka asütsü imla atar, ta kasa sangdong ajanga metetdaksü.

Office shibanger aliba mapang teyari aser osang agütsütsü asoshi NSF renema aliba metetdaksüogo. Kija aser lokti tentet shirnoki osang balala aginer parnokki Federation den e l m a i l ; nagastudents1947@gmail.com ajanga tongteprateptetsü aser iba den bendenloksema Naga Students' Federation-i nüburtem dang NSF indang official Facebook page semdanga osangtsüsang balala agitsü asoshi metetdaksüogo.



Asükwa mongpu Parliament piyong MP aika anentsüba anema December 20, 2023 nü Parliament kima Mahatma Gandhi kürakyanglu anasa Congress Tir, Mallikarjun Kharge leniba nung party balala nungi opposition MP temi longkak aيتدang tangokba noksa nung angur.

Lok Sabha nung Criminal Law Bill agizük; ano MP aika anentsüogo

New Delhi, Luchii/December 20 (Agencies): Sangküm Lok Sabha elections agitsü lia Bodhbarnü Parliament nung Opposition züngsemtem medeni Centre sorkari kanga tongtibang bill asemagizükogo; item bill ajanga British nungeri yimsüsüba mapang aliba criminal laws agientsü.

Lok Sabha nung agizükba bill asemji Bharatiya Nyaya (Second) Sanhita, 2023, Bharatiya Nagarik Suraksha (Second) Sanhita, 2023 aser Bharatiya Sakshya (Second) Bill, 2023 lir, aser item ozüing ajanga Indian Penal Code of 1860, Code of Criminal Procedure (CrPC) of 1973 aser Indian Evidence Act, of 1872 ozüingtem melentsü.

Tawa Parliament nung security raksaba nungi mangatettep adoka Parliament nung Opposition züngsem 143 anentsür lia item bill agizük.

Tang asükwa mongpu Parliament nung House anaprongla nungi MP ajak

senteper 143 anentsüogo. Bodhbarnüa Lok Sabha nung Opposition MP ana-Kerala nungi Thomas Chazhikadan aser AM Ariff na anentsü. Chazhikadan ya Kerala Congress (M) nungi aser Ariff ya CPM nungi lir.

Mongolbarnüa Lok Sabha MP 49 anentsüba atema Opposition MP temi sorkar aitsü.

Hombarnü Lok Sabha nungi MP 33 aser Rajya Sabha nungi MP 45 anenja liasü. Taoba hopta nunga Lok Sabha nung MP 13 aser Rajya Sabha nungi MP ka anenja liasü. Tang tashi nung MP ajak senteper 143 anentsüogo, aser ibaji ajanga Parliament House anaprongla nung opposition züngsemtem kanga ajema kümogo.

Ano külen TMC MP, Kalyan Banerjee-i Rajya Sabha Chairman aser linük tatong Tir, Jagdeep Dhankhar jilu ia asayamenütsüba nungi Opposition aser Centre na tsüingda aitsütep tenzükogo.

Bodhbarnü Lok Sabha Secretariat-i sangdong ka ajanga anenja aliba MP tem Parliament chamber, lobby aser galleries-i aitba nokdangtsü metedktsüogo, iba dak alia anenja aliba MP tem nem daily allowance-a magütsüsü.

Opposition MP tem anentsüba dak sendakba nung Bodhbarnü Congress Parliamentary Party senden amendang chairperson, Sonia Gandhi-i, iba sorkar yagi democracy alensetogo, ta ashi.

Sonia Gandhi-i, "Tang House nung MP aika anentsüba ama ya taoba mapang nungbo kodanga matalokdang, aser ibajia tim takhangba agütsüba agi anentsüba lir," ta ashi.

Congress National Tir, Mallikarjun Kharge-i, democratic masüba yimya nung MP 141 Parliament nungi anentsüba anema Hokolbarnü, December 22 nü INDIA telokepi linük tesem ajaklen longkak aitsü, ta metedktsü.

Tesüiba küm 9 tsüingda Health sector kanga renlokogo: Arjun Munda

New Delhi, December 20 (Agencies): Tesüiba küm 9 tsüingda Narendra Modi sorkar mapang India nung healthcare sector tsütsü ajangzüktebaji iba jakdang küm 70 tsüingda ajangzüktebaji dang nungi teimba, ta Bodhbarnü Union minister, Arjun Munda-i ashi.

Osangbenertem senden ka nung tribal affairs minister, Munda-i, "Healthcare tsütsü lenla ajak atema inyaktsü, talisa tribal nürburtem dak rangloker inyaktsüji sorkar atema tongtibangtiba lir. Health sector nung kanga asüngsashiba asenoki kuli süa nguogo. Tanübo tang mezüing linük nung health ya terenlok den sendakteptsür," ta ashi.

"Linük nung tesüiba küm 9 tsüingda healthcare sector nung ajangzüktebaji iba jakdang küm 70 tsüingda ajangzüktebaji dang nungi teimba," ta pai ashi.

PM JANMAN kübok tongti kaji tribal health ya lir, ta pai ashi.

Paisa Ayushman Bharat ajanga linük nung nürburtem tajangzük anguba aser Pradhan Mantri Jan Arogya Yojana ajanga sensakertem nem health security agütsüba metedktsü.

"Alima nung sorkari fund agütsüba healthcare program

tulutiba ya ajanga nisung crore 55 dak tema ajangzükda ktsütsü, küm ka nung sen lakh 5 tashi insurance agütsütsü nükjiding nung inyaker," ta Union Minister-i metedktsü.

Taküm July 1 nü Ato kilonser Modi-i National Sickle Cell Anaemia (SCA) Elimination Programme tenzükja liasü, talisa tribal nürburtem iba tashidak nungi nokdangtsü nükjiding nung iba program ya tenzük, ta pai metedktsü.

Iba mission nükjiding ya tribal crore 8 shidak SCA tendangtsü atema lir. SCA tendangtsü atema nisung lakh 90 indang data bo bendenogo, ta pai metedktsü.

Minister-isa, Pradhan Mantri Janjati Adivasi Nyaya Maha Abhiyan (PM JANMAN) ajanga tribal tesemtem nung terenlok kanga alitsü, ta metedktsü.

"PM JANMAN Mission ajanga scheme balala ajanga mayimjemba Particularly Vulnerable Tribal Groups (PVTGs) 75 dak rangloker aser iba atemaji sen crore 24,000 shi lenzükja lir," ta paisa metedktsü.

Linük nung AIIMS 8 dang aliba nungi tangbo 23 kümogo, ta paisa shisem.



December 20, 2023 nü New Delhi nung Parliament kima West Bengal Chief Minister, Mamata Banerjee aser Samajwadi Party MP, Jaya Bachchan na ajurudang tangokba noksa nung angur.

India nung anogo 9 tsüingda Covid case anasü agi teimba kümogo

Pune, Luchii/December 20 (Agencies): Central government forum of labs 'Insacog' nung BA.2.86 (nicknamed Pirola) descendant JN.1 indang sequences 19 putetogo; Maharashtra state nungi ka aser Goa nungi 18 liasü.

Iba subvariant ya anogo ishika jakdang Kerala nung mezüing puteta liasü. Tesüiba anogo 9 tsüingda India nung

coronavirus Covid anasü agi teimba kümogo; December 11 nü coronavirus case 938 aliba nungi Mongolbar tashi nungbo coronavirus case 1,970 kümogo.

Iba subvariant ajanga US densema linük balala nung coronavirus case kanga bulua proker, ta mongintemi bilemer.

Osangbener den jembidang National Indian Medical

Association (IMA) Covid Task Force co-chairman, Dr Rajeev Jayadevan-i, "Anüolen aliba linüktem nung subvariant tekeratiba prokbaji JN.1 ya lir," ta metedktsü.

Insacog official sangdong ka ajanga, tawa Kerala nung nisung ka asübaji Covid ajanga dang masü saka temang nung tanga timtem balala ajanga-a liasü, ta metedktsü.



World Saree Day amongtsü anogo ka jelia December 20, 2023 nü Agra nung bendangtsür raliwalirtemi saree agir Taj Mahal anasa tangokba noksa nung angur.

INDIA-i Varanasi nung PM Modi den toktepdaktsütsü atema jembir

New Delhi, December 20 (Agencies): Opposition teloktep INDIA-i Ato kilonser, Narendra Modi indang Lok Sabha constituency- Varanasi menden nung kanga nüngtugu lenir ka pa den toktepdaktsütsü atema jembidar, ta osang ka ajanga metedktsü.

Mongolbarnü New Delhi nung INDIA teloktep senden mena party tem tsüingda menden lemsatsü atema jembiba sülen anogo ka lir iba osang ya angashir.

2004 küm dak alaka 1991 küm nungi Varanasi Lok Sabha menden nung BJP-i dang takok ngua arudar; 2014 aser 2019 Lok Sabha election nung Modi-ia iba menden nungi takok ngua liasü.

Osang angashiba agi, INDIA teloktep nungi Varanasi menden nung toktepdaktsütsü atema opposition nungi lenir ana

- Bihar Chief Minister aser Janata Dal (United) tongti, Nitish Kumar aser Congress General Secretary, Priyanka Gandhi na tenüing benoka lir.

INDIA teloktep tenteterem rongnung Nitish Kumar densema lir aser 2024 Lok Sabha elections nung opposition nungi Ato kilonser candidate ji pa mesüra Congress Tir, Mallikarjun Kharge shimtsü ta aikati bilemer.

Priyanka Gandhi-ibo election ka nunga metoktepdang. 2019 küm Varanasi menden nungi lai tokteptsü ta jembia liasü saka Congress-i Ajay Rai ang toktepdakja liasü.

Osang angazükba agi, sangküm Lok Sabha election nung Varanasi menden nungi toktepdaktsütsü atema TMC tongti, Mamata Banerjee-i Priyanka Gandhi tenüing benok.



TIR YIMYIM YIMOBILEM (EDITORIAL)

DIMAPUR YANGTEPNÜ, DECEMBER (LUCHII) 21, 2023

Temeim Mapa Asüngsashidi

- Tangsen Lemtur

Tasen Lai nung tongtibangtiba olongji 'temeim' lir ta Laishirtemi ashir, aser Tasen Lai nung iba olong ya aiben tetshia lir. Alima nung nütsüng teimba-teimba dang akümer yamaji sensakertem-a teimba-teimba dang akümer, anungji parnok dang temeim sayutsüji tang Khristmas mongpu ya lir. Khristmas benjung amongtsü lia nisung aikati chichiba Khristmas tetezü keta amongtsü yongyaba mapang nung kibong karbo sensak tia nung shisabulua lir, ta bilemtetdi. Sensakertembo peria aliba mapang mali saka Khristmas nungsa teyari tenüngdakba, ta angateta Yisu Khrista asoba benjung nunga maneni nüngdakba kibong kar danga yarira küm tembanga arudang temoatsü agitetba kibong kaka asütsü. Benjung asünungji kidang kinüngertem den kija pelatepa amongtsü mapang ka masü saka kinünger, pur-medemer aser kiyong-kinar den benjung tepela aser temeim lemsatepa amongba mapang ka lir. Akhidang nungi tsüraburtemi benjung tenüng nung kinünger aser medemertem jaoka chiyungtep, shijep den sempet agütsütep aser saisapong sentong tapu balala ayongzüka yimkong pelatepa among. Tanü-a asenoki tsürabur sobaliba tajungji mamadoki benshidar aser benshitsüla. Küm songtema arudang Tsüngremi asenok aika nem maneni taküm tajung den ali rongsen moatsüogo, anungji Tsüngremer temoatsütem züngdanga Tsüngremer asen nem moatsübaji kinünger tsüngda dang masü saka aseni meteta aliba nüngdakbapurtem den-a lemsatepdi. Terenlok aliba linüktem nungbo melungtet telok balalai temelungertem dang nungi senotsü süaka, chiyungtsü süaka mesüra tanurtem atema sempet süaka bendena makamaiter kibongtem aser tanurtem nem lema agütsür, saka asen lima nungbo yamaji meinyaker asünung pei sasa apiteta inyaktsüba dang. Benjung mapang temeim mapa tilaka inyakba ajanga kibong kar nungbosa tepela bener arutsütsü ta tamang nunginyakdi. Makamait kibong kar yariba ajanga kidang chirnurtemia tangar yaritsü angazüker. Ano külen, Arogo atema tongti teinyaktsüji tanela chiyungtsü anganüa agütsüba ya lir, ajisüaka Arogotemi alia oa inyaka timtemer/nüngdakbapur ali shi nung nüngdak peritsüra junger ta bilemer. Ajak dak alia asenok ajaki Khristmas amongba mapang bilemtettsübaji, ibai menenpurtem dang Tsüngrem temeim jungkai adokba. Anungji ibaji bilemteta asenoki nüngdakbapurtem kar dangbo temeim sayutsü merangtsübaji kanga tongtibang. Khristmas anogo ya Tenla kidang sentong tajung yanglua agiba dang masü mesüra kiyong-kidanger aser kinüngertem den benjungtepba dang masü saka mamangbapurtema ayongsema amongba mapang ka südaktsütsüla. Yisu Khrista alima nung alidanga menenpurtem den külemi lisema aruba ama asenokia shinga mesendoki iba benjung külemi amongtsüla. Küm piyong asenoki meranga inyakba nungi aser Tsüngremer moatsüba nungi temeim mapa inyakra temeim mapa inyakba sobaliba asüngsashitsü, aser temoatsü manung küm tasen nung ayaoktsü.

OLEMSABANG

Tanü ya Naga Arogo Asoba anügo lir

- N.Toshi Ao

(Yashi adok nungi...)

Tsüngrem sentong Asentenshia tenzüksü 1870s nung American Baptist Mission asen limai atua arogo tenzüksü ya tanga kecha masü, saka Tsüngremer original sentong ataloktsü asoshi tenzüksü lir. Ozü tsürabur nokinketer shirnok küm aika sünglong külema, mangsa aser shiruru tia nung liasü parnoki kodaser kodanga mongudangba nisung (Dr.Clark) dang onok yimtaki atung ta shitet? Kodaser onoki nai sayuba yimsü tasenji (Yisu yimsü) agizükdi ta shitet? Onoki na ozü limai arem min tulo ajanga anir tur lepteptsüngtep mapang nung ne nüngdak ajak peria agüja tsükchirtem nungi na kümzüka ayutsü ta koda shitet? Na anir atutsü atema nokinketer lanur 60 ner ki tonga yoktsü ta nangzük? Item ajak ya Dr.Clarki angashidang iba ya Tsüngremer ain, pa mapang aser pa sentong ta angateta ajanga Pai tamasa Godhula aser tebuttsü Lucy Molungkimongi yoktsü sentong yanglu. Item ajak ya asen nüklai arudang Tsüngremer sentong ya tesüngmangtsü ta angateta ali nung apudaka Pa nem tenüngsang agütsütsü kanga talang ta asenoki angatetdi. (Item tatalokba otsü aika zülua lir aser tsüraburi onok dang ashiba otsü jembir mejembima lir).

Kanga sasar adi

Asen Ao/ Naga arogo tenzüker küm 150 tema arudang item temoatsü agi khuret tulu küma aoba asenoki ajanga arudaki. Tia maka asen Ao Mungdang 1947 küm Jubilee Resolution No.3 nung ajemdaker kensüh-osüh tenzüka aruba joko küm 75 junga arudaki, aser tanübo Govt.court nung case benoka jembisa kümogo

Tanabuba nung asen Aor Tsüngrem tenzüker (senior ordained minister aika densema) iba ken o nung tai menaa jembir aser zülur aser nütsüng nübur aika mangmangdaksür.Kanga sasar!

Tasembuba nung ozü Molungkimong arogoi Ao Mungdang, Ao Arogotem aser Tenzükertem nungi imlaji tajungshi o, temotongshiba aser sayuben o liasü. Saka tanü tashi ozü arogoi itemji aeiben mangashi mesüra majangshi. Itemji melena shisabulu aser nüngsen-komen aika ajurua arur. Ozü arogo nungertem rongsen aser nübu endokba den tanela nung yiruba, nüktsü ayimba mapang aeiben ajanga arudaki. Tzühah! ozü tsüraburtemi lijaba yimsü melena Yisu yimsü agizükba taa to ya no? ta kanga sasaseter. Akok asübo parnok nema ngudaktsüner adi!

Tayongzükba olen kar

Tanü ya asen Ao/Naga sor küm 152 buba tenzüker. Naga lima nung Arogo/Mungdang tambusang ama asenokbo American Baptist Mission original sentong "Tamaren China lima" (Celestial Empire) koba parnoki metongtet saka asenok nem nongloka toktsür ao ibalen jagi asen shisatsü,rongsen aser nübo ajak meyipdi ta ayongzüker. Ibaji meinyak tashi Tsüngremer asen Ao kin dang mepelatsü.(Iba indang ni züluba kakat China Limai ABAM Mission 2010 nung angutsü).

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Koinonia Baptist Arogo ainlen jajar tem nem coffee agütsü



December 20, 2023 nü Koinonia Baptist Church (KBC) nungi lanurtemi Koinonia Prayer Centre (KPC), Tsiesema Army Camp anasa National Highway-2 nung ainen jajar tem nem angati coffee, süngo aser amtsük agütsü dang tangokba noksa nung angur.

Kohima, Luchii/December 20 (TYO): Bodhbarnü Koinonia Baptist Church (KBC)-i Koinonia Prayer Centre (KPC), Tsiesema, Army Camp anasa National Highway-2 nung ainen jajar tem nem angati coffee, süngo aser amtsük agütsü. Koinonia Media Ministry-i sangdong ka ajanga, Khristmas mongpu tenzuka temeim aser tepela osang sangdongtsü nükjidong nung

küm shia Arogo kübok Junior CYE aser Youth department-i iba sentong ya ayongzüka agir, ta metetdaksü. KBC-i ainlen jajar tem nem angati coffee, süngo aser amtsük agütsüba den külemi lanurtemi yangluba 'bookmarks' lema agütsüba ajanga Khrista osangtajung prok. Küm shia Koinonia Baptist Arogo kübok lanurtemi iba sentong ayongzüka agiba

ajanga, Khristmas mongpu ya benjung mapang ka dang masü saka tamangertem longjemer temeim aser tepela prokba mongpu ka südaktsür, ta sangdong nung shia lir. Bodhbarnep Koinonia Baptist Church nung Evanagelist, Rukuotuo Kuotsu-i sarasadema iba sentong tenzükba sülen lanurtemi ainlen jajar tem den Khristmas temoatsü lemsatep tenzuka liasü.

Temenen moatsütsü atema Pope dak temeden mali: Franklin Graham

December 20, 2023: Roman Catholic putirtemi kasa tetsür o tetsür na mesüra tebur o tebur na kiyimertem moatsütsü atema Pope Francis-i putirtem nem temelaba agütsüba atema sayutsünger, Rev. Franklin Graham-i Pope Francis sashia aitsüogo. Nüngtugu sayutsünger, asür Billy Graham'er jabaso, Franklin Graham-i, Tsüngremi 'temenen' ta ajaba moatsütsü atema Pope Francis dak temeden mali; kasa kiyimertem moatsüba ajanga Tsüngremer obendang nungi na (Pope) mekümsütsü, ta metetdaksü. Vatican-i tetsür o tetsür na mesüra tebur o tebur na kiyimba pu-masemer, ajisüaka

putirtemi parnok ama nisungtem moatsütsü, ta osang sangdongba sülen Hombarnü (December 18) Franklin Graham-i Facebook post ka ajanga, "Yimsü lenirtemi item ama moatsübaaji ajanga Tsüngremer obendang nungi na mekümsütsü!" ta metetdaksü. Franklin Graham ya Billy Graham Evangelistic Association aser Samaritan's Purse naprongla nung Tir inyaker. Franklin-i, "Kasa kiyimertem moatsütsü atema joko Pope Francis-i Catholic putirtem nem temelaba agütsüogo. Ajisüaka Tsüngremi 'temenen' ta ajaba moatsütsü atema Pope densema asenok

shinga dak-a temeden mali. 'Temenen dang tajung aser tajung dang temenen, ta ajarterem ayatai...' (Isaia 5:20)," ta metetdaksü. "Osangtajungji ibai lir, tang Tsüngremi tai atoktsü, ajisüaka asenoki Pai aginüba ama inyaksüla. Asenoki temenen nungi meyiptsüla aser Par jabaso, Kibuba Yisu Khrista dak tamang akatsüla. Yamaji mesüra Laishibai yamai ashir, 'Ozüng raksarterem aser temenen menarterem külemi tesamatsüba alitsü, aser shirnoki Kibuba senzuka yutsüdir samatsü'(Isaiah 1:28)," ta Franklin Graham-isa metetdaksü. (Maneni tapak 8 nung...)

ANOGO ABEN TSÜNGREM DEN

Tsüngremi mulungba 1 chubatem 3:9-14

Obendang tajung aser telemtetba shisatsü kü dang sayuangma; kechiyong Ne temelaba ozüng nung ni amanger. T.Ken 119:66. Asenok obendang shitak süra takümüji jangra tatemba alitsü. Solomoni shisa kaa telemtetba agiba asoshi Pa tenüng tajung angu. Kodang pa chuba aküm pai shisatsü meshi. Asenokia anogo shia telemtetba agir aser aiben asenoki mekümdang shimer. Kechi ataloktsü mesüra asenoki shimba nung kechi lir aji meshisadangi shimtetter. Asenok ajaki telemtetba ka lia dang inyakner. Telemtetba tejangja malir shingaia maginer. Telemtetbaji asenoki agira asenoki tangar asoshi aser asenok asoshia tajung bilema agitsüla. Telemtetba agiba nung tongtipangba tajungji ajemaluba asütsü akok, asenoki ajemalua telemtetba agir mapang ka nung inyakbaji tai telemtetba asütsü akok. Obendangba nung tashi maitji alima ajunga nung meimchir dak aketba tashi mait lir. Kar nem tajungba bendangtsü sempet agüja liaka, shinga tashi mait nungi jenbua mali. Ajak dak alia, asenoki metet: Asenoki aibelen obendanga lira kechi shidak aji inyaksü aser aji Tsüngremi mulungba nung ayutsü meranga lira, aser asenoki tatok bushia lira, asenok aibelen Khrista tenüng nung asenok aibelenba tatok angutsü ta jangjatsüla. Tejangja metetba aser agizükbaaji tongtipangtiba. O Tsüngrem, Ne O bendang tabensa lir. Ne O ajanga aser Tanela Temeshi-i onok telemtetba ajak yariang; Yisu tenüng nung. Amen.

North Korea nunger refugeee temi yimjung atema sarasadem

Seoul, December 20, 2023 (Agencies): South Korea nung jenoka aliba North Korea nunger refugeee temi jeli Khristmas sentong ka nung Korean Peninsula ya ka küma longjemtsü aser yimjung alitsü atema sarasademogo. December 18, 2023 nü South Korea yimtiba, Seoul nung Committee for Korean Reconciliation of the Archdiocese of Seoul-i iba sentongji ayongzüka liasü. Kasa sentong nungji refugeee kati par linük (North Korea) nung yimsü temeden alitsü atema sarasadem. Iba sentong nung sarasademdang refugeee jagi, "North Korea nung miimshia amangertem sadoksadoka amangtettsüsa lenmang lapokjang aser tekaratiba nung linük nung yimsü temeden lidakjang," ta sarasadem. Iba committee nung vice-chairman, Jeong Soo-young leniba nung putirtem aser Arogo züngsemtemi refugees agi. Kasa sentong nungji Arogo lapokba shelter homes

nung alir children's choir kati Khristmas carols aten aser Santa Claus-i parnok nem sempet lema agütsü. Putir, Jeong-i North Korea nunger refugeee tem dang, tayongzüka balala liaka nenok teimla mesamatsüla aser pei linük (North Korea) nung aliba kinüngerterem atema sarasademtsütsüla; kenü anogo nungbo nenok longjemtsüsa lenmang lapoktsü, ta metetdaksü. Tekülem sentong tembangba sülen Seoul nung Archbishop, Peter Chung Soon-i refugeee tem ajuru aser parnok den külemi chiyung. US Commission on International Religious Freedom (USIRF)-i ashiba agi, tang alima nung yimsü temeden anema inyakba linük tamajungtibaji North Korea lir. North Korea nung Communist sorkari tamangba yimsü benschirtem maneni reshikangshir mesüra tepseter. Tang North Korea nung Khristan 50,000-70,000 shi den külemi tekülem sentong amenoka aliba Khristan melungtet telok- Open Doors-i metetdaksüogo.



Longleng district kübok Yangching Baptist Arogo tenla ki tasenba meshiteta lapokba sentong temer Longleng assembly constituency MLA Wb. A.Pongshi Phom (tiyong nung muffler zülöker alisang) den sentong nung shilem agir aser Yangching nunger tanishirtem kar tenla kima noksa nung angur. Iba tenla ki ya Phom Baptist Christian Association nung Executive Secretary, N.Tialemba Phom-i sarasadema lapoktsü aser paisa sentep ana tashi nung Tsüngrem o jembia liasü. Yangching yim ya Upper Konyak den ayong agi artsüdanga lir. Iba yimtak tang yangluba tenla ki ya pezübenbuba yanglur asütsü. (December 20, 2023).

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Shilupuren

(n) meimchir shilu balalaren indang bushiba (anthropology)

* Kaketshirtemi Aor shilupuren indang temulung agüja bushitsüla.

Shilushira

(n) shirangba (sickness)

* Chiyongtsü shitak mechira shilushira dang alitsü.

OLONG PAITEP # 6650

Grid for crossword puzzle #6650 with numbers 1-17.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S_ _ _ i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangliba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 6648 TELANGZÜBA

TIPIEN :

- 1. Tanga, 6. Wara, 7. Rajang, 9. Anük, 10. Jenjang, 11. Alar, 14. Ngashi, 15. Nala, 16. Mechi.

LANGTSÜNGLEN :

- 2. Anga, 3. Yabang, 4. Tarok, 5. Orak, 8. Ainer, 9. Anema, 10. Jabili, 11. Among, 12. Miim, 13. Anem.

NAI-A YA METETTER MA

ICC T20I BATTING RANKINGS:

- 1. Suryakumar Yadav IND
2. Mohammad Rizwan PAK
3. Aiden Markram SA
4. Babar Azam PAK
5. Rilee Rossouw SA
6. Brandon King WI
7. Ruturaj Gaikwad IND
8. Jos Buttler ENG
9. Dawid Malan ENG
10. Reeza Hendricks SA



Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Manipur HC-i Kwatha yimtsüing atema benokba PIL agizükogo

Impfal, Luchii/December 20 (Agencies): Manipur nung High Court-i, Tengnoupal district kükok Kwatha yimtsüing nung alirtem mepetmesü tulu nung aliba (humanitarian crisis) dak sendakba nung jenjang tapet agitsü Public Interest Litigation (PIL) ka benokba agizükogo.

State nung kin o kin tsüingda taoba ita tenet tashi amangatetep tulu adoker aliba ajanga Kwatha yimtsüing nung alirtem kanga timtemtepar.

Kwatha yimtsüing ya Tengnoupal district kükok Myanmar den arrtsü nung aliba Meitei nunger yimtsüing tatembangbuba lir.

Iba yimtsüing nung nisung 370 lir aser tang state nung mepetmesü tulu adoker aliba ajanga parnok tebang agi meshitetba timtem nung lir.

Kin o kin tsüingda aser Kuki nungertem mangatetep adokba sülen Moreh nung aliba Meitei nungertem parnok ki toktsür jenshia ao, ajisüaka Kwatha kokba Moreh nungi km 20 shi pilar lir, iba yimtsüing nung alirtemi parnok yimtsüing maneni kümzüka yudar.

State nung tanga tesemtem den tesendaktep kecha makai akümba ajanga iba yimtsüing nung aliba Meitei nungertem kanga timtemtepar. Kwatha yimtsüing ya Kuki nunger yimtsüing trok agi meketbanger lir.

Iba ken o bentettsütsü merangtsü asoshi Manipur High Court-i, Kongjengbam Chingkhamb-i benokba PLI ka agizükogo.

PIL nung ashiba agi, yimtsüing nung alirtem Meitei

mangatetep aliba ajanga par yimtsüing moteter mesüra toktsür moteter.

HC-i iba ken o ya 2024 küm January 24 nü angadangtsü latettsüogo. Petitioner tenüing nung Advocate Naorem Umakanta Singh aser pa associate tem okadak nokdaka liasü.

Manipur nungi Meitei nungertem Kwatha yimtsüing nung alir.

Iba yimtsüing ya Indo-Myanmar arrtsü nung sentoka toktsür aliba yimtsüing tila ka lir, koba 1819 küm Burma-i amakba mapang nungi liasü.

Kwatha nung kibong 61 lir aser nütsüingyongsük 370 lir. Iba yimtsüing ya Moreh nungi km 20 aser state yimtiba nungi km 129 pilar lir.

Assam Deputy Speaker-i INDIA bloc aitsü

Guwahati, Luchii/December 20 (Agencies): Assam Deputy Speaker Numal Momin-i, opposition party temi tentetba INDIA bloc aitsüogo aser ashiba agi, ochi mashi inyakyim ajanga parnok jurila ajanzüksü asoshi parnoki tashi aginer.

Paisa, Bharatiya Janata Party (BJP) puri "Sabka Saath Sabka Vikas" banner kükok ajak terenlok asoshi bendanga agüja inyakba aser parnok tebilemba indang medemdanga jembia liasü.

Momin-i, tawa Congress MP Dhiraj Prasad Sahu ket nungi Enforcement Directorate-i sen crore aika apuba ya INDIA bloc yongtsü nung ochi mashi inyakyim aika aliba tatishitsü ka lir ta ashi.

Paisa, INDIA ya tebilemba

asertaginüba balala bener temangmang agi sünger aliba telok ka lir aser Ato Kilonser Narendra Modi atsüingtoktsü atema dang longjemba ashi parnok longjemer nükla mesüra nükjidong ka mali, ta ashi.

Iba lokti tentet ya yakta loksatsü ta shia Momin-i ashiba agi, election atema menden lemsatsü asoshi sensaksemba mapang INDIA bloc yongtsü nung mangatetep adoktsü, kechiyong party tulutemi tilatem nem parnok takhangba magütsütsü.

Paisa, Congress pur nüboyimba majungba aser democratic institutions tem akümtsübu masüba ajanga parnok Lok Sabha nung menden tajemba küma taruba election nung menden 40 dak tajemba akümtsü, ta ashi.

Kasa mapang nung Momin-i Modi lenisüba tenüingsanga jembi aser ashiba agi, pa lenisüba nung India economy 10buba nungi 5bubai tuogo.

Paisa, Modi indang direct benefit transfer schemes aser tekübokba jenjang nung aliba nüburtem ajungketsü atema rangloker inyakba atema tenüingsang agütsü.

Maneni pai, Rahul Gandhi-i, Trinamool Congress MP Kalyan Banerjee-i Vice President Jagdeep Dhankhar jilu aiba tangokba aitsü aser ashiba agi, iba inyakyim ya taktsüka aser MP kati beshitsüba yimya masü.

Paisa, Congress-i yimjak nung o langteptsü tsübuba aser democracy tamendakdak tilutsütsü asoshi inyakyim balala benoka inyakba aija liasü.

Meghalaya: RDA-i Lok Sabha election atema Kharjarin shim

Shillong, Luchii/December 20 (Agencies): Meghalaya nung United Democratic Party (UDP) and aser Hill State People's Democratic Party (HSPDP) nati kümtetba Regional Democratic Alliance (RDA)-i, 2024 küm election atema Shillong Lok Sabha menden nungi tokteptsü asoshi taoba Hynniewtrep Youth Council (HYC)

tekolakba Robertjune Kharjarin shimogo.

December 19 nü RDA senden ka amenba sülen iba telemtetba agiba sangdonga liasü, koba regional tashitem longjemdaksütsü aser national parliament nung Shillong constituency ola angashidaksütsü nükjidong nung agiogo.

Iba senden nung UDP tir

Metbah Lyngdoh, HSPDP tekolakba KP Pangniang, Minister Shakliar Warjri aser tanga tongtibang lenirtem aikati shilem agia liasü.

Temtetsü kaji 2024 Lok Sabha election agitsü asoshi ita pezü dang anunga lir aser iba election atema Meghalaya nung party timbai parnok indang candidate shimatokogo.



OP Sadbhavana project kükok Assam Rifles-i, 'Passion to profession' omen nung ajemdaker December 20 nü tetsürtem atema Skill Development Centre ka lapoktsüogo aser Tuli nung Merankong Women Association nem Sewing machines 20 tenla agütsüogo. Iba Centre ya DIG, 7 Sect Assam Rifles-i lapokja liasü. Sewing machine aser training agütsüba ajanga aiür chanutem aser tetsürtem nem sen aatsü asoshi lenmang lapoktsütsü.



China northwest tsütsü Gansu province kübok Dahejia jila anasa Yangwa yimtsüung nung ki ka laor aliba nisung kati repringba noksa nung angur. Hombar aonung menoknok tesashi anokba ajanga tenem agi sünga aliba region nung nisung aliba ki raksatsü aser nüburtem asük-asa agi kanga tim atemer. China nung ibai küm tuko nung menoknok tesashitiba alitsü.

France nung mangatettep aliba immigration temelenshi agizükogo

Paris, Luchii/December 20 (Agencies): Ita aika yimten yimsürtem atsütepa aruba sülen France nung immigration policy akangshia parliament nung legislation agizükogo. Iba bill ya Tir Emmanuel Macron'er centrist Renaissance party aser Marine Le Pen'er far-right National Rally (RN) nati bhukuma liasü. Iba vote nung Macron'er party sedang aser health minister Aurelien Rousseau-i pa mapa nungi anentsü ta sangdong.

agitsüa menudaktsür. Iba ozüing yagi tanur tem detention centres nung ayuba nokdang. Iba ozüing yagi senso aser migrants tem bendanger, aser ozüing agi mela linük nung liaka sorkar sentong nungi teyari agiba nung bendanger. Ozüing tesashiba ya right-wing party temi Hombarnü bhukuma nokdak. Le Pen-i iba bill pelashishia agizük aser far-right asoshi "ideological victory" lir ta ashi. "Ibai asen bill lir," ta right-wing Republican party lenir Eric Ciotti-i ashi. Saka left-wingers temi iba ya ajanga Macron-i far-right nem kokdaktsür ta ashi. "Pei temulungtetba aser tezüingzüktep ashioktsür alimai kodanga mamadoktsü," ta Socialist party lenir Oliver Faure-i ashi. Züingsem linük 27 aliba European Union nung asylum

system melenshitsu asoshi tezüingzüktep ka agitsü ghonda ishika lia France nung iba ozüing atema vote agitepa liasü. EU sorkartem aser European Parliament züingsem temi mulungba tezüingzüktep tasenba nung border detention centres amenoktsü aser asylum bushirtem magizüki aliba tekeraba nung pei linüki meyipa yoktsü melar. Ajisüaka iba ozüing ya Parliament aser züingsem linüktemi ano magizük. France nung iba legislation tasenba ajanga sorkar tenteta aliba alliance nung telemsa aliba temai adok. MP 27-i iba legislation anema vote agitsü aser 32-i vote magitsü. Health Minister Aurélien Rousseau, shiba lanuwa mapang Communist party züingsem ka liasü, pai iba immigration law anema pa mapa yutsüogo. Ano danga minister kar mapa yutsütsü bilemer.

Taruba küm US tir election mapang Trump-i Colorado nungi metokteptetsü

New York, Luchii/December 20 (Agencies): Colorado indang Supreme Court ajanga obendang ka nung, 'constitutional insurrection clause' ka mechi taruba küm tir election mapang Donald Trump-i state nungi metokteptetsü, ta ashi. Court nung obendanger 4-3 ajanga obendang agitsüba nung ashiba agi, küm asem shi jakdang US Capitol nung mepetmesü adokba sorkar anema nokdakba nung pa dena liasü aser iba yongji Trump ya candidate ka asitsü metemsü ta ashi. Ajisüaka iba obendang ajanga Trump danga state tem nungi tokteptsü aliba menokdang aser par teloki US Supreme Court nung iba ken o benoka jembishitsu ta ashir. Iba telemtetba nung aibelen lir, ta parnoki ashir. Iba obendang nung March 5 nü state indang primary election dang shia lir, aser iba

anogo Republican voters temi tir asoshi parnoki aginüba candidate shimtsü. Saka iba ya ajanga taruba küm November ita Colorado nung general election agitsü aliba nung kongshitsu akok. Ibai presidential candidate ka disqualify asitsü atema US Constitution indang 14th Amendment nung Section 3 mezüingbuba amshiba alitsü. Mongulbarnü telemtetba ya taruba ita tashi 'hold pending appeal' nung yua lir aser ibai Colorado kisüing atema lir. Iba ama New Hampshire, Minnesota aser Michigan nunga ken o benoka jemi saka takok mangu. Obendanger temi parnok obendang agitsüba nung, "Onoki iba telemtetba ya züpa-süpa agiba masü. Onoki kanga shisadanga onok matsüingdang tasüingdangba tem asadang," ta zülua liasü. "Tetsübo mesüra nisung kar bhukuma masü onoki

onok mapa shidak ozüing agi melaba ama inyak." Iba telemtetba yagi taoba mapang Colorado judge kati obendang agüja aliba melenshitsu, shibai 14th Amendment indang insurrection ban ya tir tem dak mokongshir, kechiaser section nung parnok tenüing tejangja shia mali, ta shia liasü. Kasa lower court judge-ia US Capitol nung rongrong adokdang sorkar anema nokdakba nung Trump-i shilem agia liasü ta ngutet. Tir Joe Biden-i election nung takok anguba atema January 6, 2021 nü ozüing yanglur temi kulizüing agitsüba mapang Trump sülen anidakertem Congress telungi ai. Colorado Supreme Court indang telemtetba ya January 4, 2024 matong tashi mamshitsu, kechiaser iba anogo nung state-i presidential primary ballots menüingtsü. (Maneni tapak 8 nung...)

OFFICE OF THE MERANGKONGTSUR TELONGJEM
H.Q.MERANGKONG
Dist. Mokochung, Nagaland.

TENÜNGSANG AGÜTSÜR


2023 küm tematiba Tsüingremer tashi dak yimlanendaka aser meranga inyaker takok tajung angurtem nem Merangkongtsür Telongjem Mongdangti ajanga tenüingsang aser tetushi agitsür.

1. **Wb. ARIKUMBA**, Lt. Tareptsüba aser Wt. Tiongkala na jabaso Deputy Commissioner.
2. **Dr.MERANGMENLA**, Lt. S Lanumerenaser Wt. N Apokla na jala Doctor of Philosophy Chemistry.
3. **Dr.BENDANGMENLA**, Wb. Tazungmeren aser Wt. Nungshienla na jala Doctor of Theology.
4. **Dr.LEREMMONGLA**, Wb. Imkongtoshi Yaden aser Lt. Chubasangla na jala Doctor of Philosophy Education.
5. **Dr. YASHIZUNGLA YADEN**, Lt. I Saku Yaden aser Wt. Elilla lmsong na jala Doctor of Philosophy Education.
6. **Wb. IMKONGNUNGBA**, Lt. Tsuknungrensang aser Lt. Maongkala na jabaso Assistant Registrar Nagaland University.
7. **Er. IMTISANGYU**, Wb. Longrichiba Jamir aser Wt. Marmenla na jabaso Junior Engineer Class II Gazetted, Power Deaprtment.
8. **Sp. CHUBAMONGBA IMSONG**, Wb. Pangerlemba aser Wt. Dzuthore na jabaso Junior Divisional Accountant, Treasuries & Accounts Department.
9. **Sp. NUNGSHIKABA**, Wb. Pangerlemba aser Wt. Dzuthore na jabaso Family Welfare Assistant, Health & Family Welfare Department.
10. **Kr. TEMJENNUNGLA**, Wb. Takuwati Ao aser Lt. Lanunochetla na jala LDA cum Computer Assistant, (District) Animal Husbandary Veterinary Sciences.
11. **Kr. LIPOKILA**, Wb. Tsuktituba Ao aser Wt. T Moarenla na jala LDA cum Computer Assistant, (Directorate) Public Health Engineering Department.
12. **Sp. WATILEMBA**, Wb. Waimongba Ao aser Wt. Tialila na jabaso LDA cum Computer Assistant, (Directorate) Office of the Chief Electoral Officer.
13. **Sp. AKANGTEMSU YADEN**, Wb. Alemtoshi Yaden aser Wt. Tenlaangla na jabaso Master's Prize for overall highest Grade M. Th Senate of Serampore College (University).
14. **Sp. NUNGSANGKUMZUK**, Wb. Imtisobo aser Wt. Imiangsü na jabaso Governor Award HSSLC.
15. **Kr. MAONGNARO**, Rev. C Tongpang aser Wt. Moala Kichu na jala Bachelor of Arts History Department nung Gold Medal.
16. **Kr. KILENKALA**, (Nungit Zungsem) Wb. Tialiba aser Wt.Longernaro na jala HSSLC tatidang nung Top 9.

Nenok wadang ajak nung Tsüingremeri maneni moajangma.

TSUKNUNGPENLA JAMIR President Merangkongtsür Telongjem
LEPZUNGSANGLA General Secretary Merangkongtsür Telongjem

Linük tim atemba ya India-ia masü, US-ia masü: Nawaz Sharif



dictators nem temeden agitsüba asoshi obendanger aitsü. "Obendanger temi parnok (dictators) nem narozük aziüktsü aser parnoki Constitution raksadang par inyakyim nung temeden agitsü. Ato kilonser asoshi jembidang obendanger temi atsüingdoker. Parliament shibangtsü asoshia obendanger temi act agizük...kechiba?" ta pai asüingdang.

Lahore, Luchii/December 20 (Agencies): Pakistan tim atemba nung India-a mali mesüra United States-a mali, ta taoba ato kilonser Nawaz Sharif-i Mongulbarnü ashi aser sen agi anünga aliba linük nung pei sasa tetsüing nung akha ta ashi. Lahore nung Pakistan Muslim League-Nawaz (PML-N) sentong ka nung jembidang, arishi küm 73 tain Nawaz Sharif-i pa asemen yimsüsüba menden nungi atsüingdokba indang jembia liasü. "Tanü Pakistan rongsenketzüing tsütsü jenjang mejungi aliba ya India-i masü, US mesüra Afghanistan-ia masü. Asen sasa asen tetsüing nung akha... parnoki (mitkar) 2018 election nung tim masüba mapa inyaka sorkar shimtet aser ibaji ajanga nüburtem tim atemer aser asen rongsenketzüing lao," ta Sharif-i ashi. Asemen tashi ato kilonser inyaker pezüben buba inyaknüsang, Sharif-i mitkar

2017 küm pa ato kilonser menden nungi atsüingdokba nung shilem agiba atema pai taoba Pakistan spy chief Gen Faiz Hamid arja liasü. "Tepuokdak nungi Nawaz adokra parnok küm ana meranga inyakba amajok akumtsü ta ashir (Faiz Hamid aser dangartem) anema Supreme Court nung ken o ka benoka lir," ta pai ashi. Küm pezü London nung jenoka lir October ita linüki tanaben meyipa arudang PML-N lenir Nawaz Sharif ya mitkari aiben sorkar atsüingdokba linük nung asemen tashi ato kilonser inyaka lir. "Anepdang nung ato kilonser liasü aser nikongdang (1999) ni hijacker ta sangdong. Kasaji 2017 nunga ozü jabaso dang nungi ni itasen magiba atema menden nungi atsüingdok," ta pai ashi. "Parnoki (mitkar) iba telemtetba ya agi, kechiaser paroki teshimtet nisung nem yimsü südaktsünü," ta pai Pakistan Tehreek-e-Insaf lenir Imran Khan athishia ashi.

Gilgal-i Mongsen Ait Marok asayamung kokogo



Gilgal team nungi asyartem takok marok bener tangokba noksa nung angur.

Mokokchung, Luchii/December 20 (TYO): Mokokchung district kübok Longjang yimtsüung nung Mongsen Ait Club (MAC)-i ayongzüka asayaba Mongsen Ait Marok asayamung Gilgal team-i kokogo.

Bodhbarnü quarters aser semi final koka atuba sülen final nung Gilgal aser Yimsen Youth Club-A (YYCA) na asaya koba Gilgal puri goal 3-0 agi kokogo.

Final asaya ya Gilgal puri goal idaktsüsü meranga asaya tenzüik aser par telok nungi center forward Sentinungsang-i YYCA defender tem tsükpoka ia minute 2, 12 aser 20buba nung goal asem idakja liasü.

Asaya tanabuba shilem nung

Yimsen Youth Club-A puria goal idaktsüsü merana asaya saka Gilgal keeper-i ball kanga junga nokdanga asaya goal 3-0 nung dang tembang.

Asayamung nung Longkhoi (LYA), Ayenmongba (Gilgal), Ngou (LYA), aser Homuka (Gilgal) nungeri highest goal scorer, player of the tournament, best defender aser best keeper naroküm ngua liasü. Maneni YYC-B nungi asayar Impangtsung nem most promising player naroküm agüja liasü.

Asayamung shibangba sentong nung Mokokchung District Village Development Board tir Chutensangba alakteta jaoker liasü. Sentong

nung o jembiba mapang pai asyartem dang takok angutsü atema jenjang talila agia inyaksangshitsü ayongzüik.

Paisa, takok angubaji tetambang masü aser tamakok angubaji tanga takok ka angutsü asoshi maongka lir, ta ashi.

Tir-isa, lanur asyartem nem sabang tajung lapoktsüba atema aser asayamung kanga takok ngua ayongzüikba atema Mongsen Ait Club nem tenüngsang agütsü

Maneni tepela o jembiba mapang MAC Sports Secretary Bendangyanger-i, club renloka aotsü atema metsü zünga toktsüba aser nükla tajung ayuba atema club tentetertem nem tenüngsang agütsü.

ODI rankings: Babar Azam-i Shubman Gill ajatetogo

Luchii/December 20, 2023 (Agencies): Bodhbarnü ICC-i sayaba ODI rankings nung Pakistan nunger batter Babar Azam-i India nunger asayar Shubman Gill ajateta No. 1 asayar kümogo.

Gill shiba ODI World Cup mapang temaba jenjangi tua liasü pa tanabuba jenjangi asepzüka aluogo, kechiyong pa WC sülen ODI ka nung danga asaya mali.

Rating points 824 ngua Babar temaba jenjangi tuogo

asayamung nung Longkhoi (LYA), Ayenmongba (Gilgal), Ngou (LYA), aser Homuka (Gilgal) nungeri highest goal scorer, player of the tournament, best defender aser best keeper naroküm ngua liasü. Maneni YYC-B nungi asayar Impangtsung nem most promising player naroküm agüja liasü.

Asayamung shibangba sentong nung Mokokchung District Village Development Board tir Chutensangba alakteta jaoker liasü. Sentong

Bowler tem rongnung South Africa nunger spinner Keshav Maharaj maneni temaba jenjang nung lir aser tanabuba nung Australia nung pacer Josh Hazlewood lir.

India nunger rongnungi fast

bowler Mohammed Siraj (3rd), Jasprit Bumrah (5th) aser Kuldeep Yadav (8th) nungera top 10 nung lir.

Maneni Mohammad Shami 11buba nung aser spinner Ravindra Jadeja 22buba nung lir.

All-rounders' list kangabo memelenshi aser Bangladesh nunger asayar Shakib Al Hasan maneni temaba jenjang nung lir.

India nunger rongnungi Jadeja (12th) aser Hardik Pandya (17th) na top 20 nung lir.

Nuno Espirito-i Nottingham Forest coach mapa agizükogo



Luchii/December 20, 2023 (Agencies): Nottingham Forest coach mapa abentsü atema Nuno Espirito Santo shimogo, ta club-i Bodhbarnü metetdaksü.

Forest puri Mongolbarnü Steve Cooper mapa nungi anentsüba sülen arishi küm 49 tain Portugal nunger coach den küm ana ser tesadang atema tenangzüktepba yangluogo. Nuno-i pa indang career nung

tang tashi nung asaya 460 shi achaayanga aruogo, kong Premier League, La Liga, UEFA Champions League aser UEFA Europa League densema lir.

Wolverhampton Wanderers aser Tottenham coach mapa inyakba sülen küm ana shi lir Nuno tanaben England-i meyipa aruogo. Pa lenisüba nung Forest pur mezüngbuba Honibarnü Bournemouth den asayatsü.

Pa tatesa Saudi Arabia nung Al-Ittihad club coach mapa inyaka liasü aser pa lenisüba nung par team-i taoba season league aser domestic cup kokogo.

Forest pur tang PL table nung jenjang 17buba nung lir. Parnoki asaya 17 nungi asem koka point 14 ngur lir aser relegation zone-i point pongu agi dang mai lir.

Parnoki taoba asaya trok nung point ka dang ngua lir, kong goal 5-0 agi Fulham makokba densema lir.

Kasa mapang nung Cooper ya iba season Premier League nung mapa nungi anentsüba manager tanabuba kümogo. Sheffield United puri iba ita parnok indang manager Paul Heckingbottom mapa nungi anenja liasü.

Temenen moatsütsü atema... (Tapak 5 nungi...)

Vatican kübok Dicastery for Doctrine of the Faith-i "Fiducia Supplicans" ta ser sangdong ka metetdaksüba sülen ghonda ishika tsüngda Franklin Graham-i social media ajanga Pope Francis aitsü.

2021 küm nungbo kasa tentet ajanga yamai sangdonga liasü, "Kasa kiyimertem moatsütsü atema Arogo dak tashi mali, kechiyong Tsüngremi temenen moatsütsü makok."

Catholic Arogoi, tetsür o tetsür na mesüra tebur o tebur na tsüngda saakloktepba nungi temenen masü saka kasa shi nung azüapongbaji temenen, ta tesayuba agütsür.

Ajisüaka 2019 küm survey ka ajanga bushitetba agi, United States nungbo Catholic Khristan 10 shia nungi trok (shilem 61)-ibo, tetsür o tetsür na mesüra tebur o tebur na kiyimtsü atema temelaba agütsütsüla, ta bilemer.

Taküm küm tetenzüklen Church of England-ia kasa tetsür o tetsür na mesüra tebur o tebur na kiyimba nokdangyonga parnok ama kibongtem moatsütsü atema putirtem nem temelaba agüja liasü. Taküm February ita

tetenzüklen Church of England General Synod-i, tetsür o tetsür na mesüra tebur o tebur na kibong akümba sülen parnoki tenüngsang agütsütsü aser Tsüngrem dang nungi temoatsü meshitsü atema Tenla kidangi arutsü melatsü asoshi telemtetba agia liasü.

Church of England-i, Arogoi tetsür o tetsür na mesüra tebur o tebur na kibong akümba memelatsü saka parnok ama nem temoatsü meshia sarasademtsütsü akok, aser iba ya Marriage (Same Sex Couples) Act 2013 kübok tim lir, ta metetdakja liasü.

Religion Media Centre-i ayongzüka iba onük nung o entepba mapang Church of England Evangelical Council (CEEC) Working Group nung züngsem, Helen Lamb-ibo, "Church of England-i benokba temepishiba yabo tera tali-tabong lir. Külenbo CofE-i, kiyimba ya tetsür ka aser tebur ka na tsüngda dang lir, aser ibaji Arogo tangatetba ta ashir, ajisüaka külenbo parnoki kasa kiyimertem moatsütsü atema jembir. Anapronglaji kodanga külemi aotsü makok," ta metetdakja liasü.

Taruba küm US tir election... (Tapak 7 nungi...)

Trump campaign indang odongtar Steven Cheung-i iba obendang aser obendangertem aitsü aser parnok ajak Democratic governor temi shimba lir ta ashi.

"Polls balala nung Trump temaba jenjang nung aliba ajanga Democrat Party lenirtem mangmanger," ta Cheung-i sangdong ka nung ashi.

"Parnoki Biden tir inyakba nung tamang makar aser tangbo American voters tem dang taruba küm November ita election nung parnok memeindoktsü asoshi mera ajakagir."

Colorado obendang atema Biden telok nungi telangzüba kecha magütsü.

House of Representative Speaker Mike Johnson densema Republican telok nungi ozüng yanglur temia iba telemtetba aitsü.

"Party balala nung liaka vote agütsütsü tenüng züluoka aliba senso ajak pei temeden amshidaktsütsüla," ta pai ashi.

Republican nungi Trump den tokteper Vivek Ramaswamy-ia Trump tenüng tanaben meinokra pa tenüng ballot nungi agientsü ta nangzüik.

Mongulbar aonung Iowa nung campaign sentong ka nung jembidang Trump-i iba

obendang indang mesiok. Saka pa bhukumer tem dangi fundraising email ka yokba nung 'dictatorships ji yamai asor' ta shia liasü.

Iba obendang ya magienra state indang primary inyakim nungi atsüngintsü, ta Colorado Republican Party temia telangzüba agütsü.

Iba ken o benokba telok, Citizens for Responsibility and Ethics in Washington (Crew) ajanga iba obendang pelashishia agizüka liasü.

"Ibai otsüsütsü aser ochi dang masü saka asen linük nung tarutsü democracy wazüka ayutsü asoshi nungdakba lir," ta iba telok indang tir Noah Bookbinder-i sangdong ka nung ashi.

Taoba ita Colorado nung iba ken o hopta ka jembidang taoba tir indang okatsür temi, 'US Capitol nung mepetmesü adokba atema pai tenüng agia mali, anungji pa disqualify masütsüla' ta shia liasü.

Ajisüaka Colorado Supreme Court nung obendanger timbai aji magizük.

US Capitol nung mepetmesü madokdang Trump-i pa sülen anidaker dang raratsü ashi aser pa sülen anidaker temi pai ashiba ama inyak, ta parnoki ashir.

BILEMDANGANG

"Tensa balala nem na tanishidaktsü."